



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorm Omnium Generalium Et Provincialium Collectio Regia

Ab anno DLXXVII. ad annum DXC.

Parisiis, 1644

Epistola XVIII. Gregorii Papae I. Ad Romanum Exarchum. De Specioso
presbytero, & ne sanctimonialibus ad saeculum reuersis auxilium
praebeat.

urn:nbn:de:hbz:466:1-15221

Mense Decembri, indictione decimatertia.

EPISTOLA XVIII.

GREGORII PAPÆ I.

AD ROMANVM EXARCHVM.

De Specioso presbytero, & ne sanctimonialibus ad
sæculum reuersis auxilium præbeat.*Gregorius Romano exarcho per Italiam residenti Rauennæ.*

APRVD excellentiam vestram prauorum audacia correptionis debet aculeos magis quam defensionis inuenire solatium. Nam satis graue est, si illic habere prauam contingat actionem refugium, vnde disciplina debet prodire censura. Peruenit itaque ad nos, Speciosum quemdam presbyterum, qui causâ poscente in monasterio a Ioanne fratre & coepiscopo nostro fuerat deputatus, contra sui pastoris exinde voluntatem exiisse, & ecclesiastica constitutionis vigore despecto, antedicto episcopo vestra fretum tuitione resistere. Quod quia excellentiæ vestræ sine dubio pulsat inuidiam, necesse est vt ab eius vos habita discretionem debeatis tuitione suspendere: ne si nominis vestri occasione pastori suo inobediens vel contumax fuerit, ad tempus & vestros contra vos iudices defensare, atque excellentiam vestram hac ex re cogatur offendere, & nos pariter de vestra discordia contristare. Comperimus præterea, quod dici nefas est, quasdam mulieres, quæ nuncusque in religioso atque monachico habitu permanserunt, sacram vestem & suam velaturam deponere, & coniugibus, quod sine graui referre non possumus dolore, sociari. Sed hoc quidē vt facere vel attentare præsumant, fauoris vestri patrocinio fulciri dicuntur: quod nos credere peruersitatis ipsius acerbitas non permittit. Petimus ergo vt in tanto vos peccato miscere nullatenus debeatis: nam huiusmodi iniquitatem impunitam propter Deum nullo modo patimur remanere. Vnde iterum quæsumus, vt excellentia vestra in talium se causarum defensione non misceat, ne & Deus suam defendat iniuriam, & inter nos aliorum pariat culpa discordiam.